


SLUB Dresden

zell

**3.A.
6389**

m035 | S12



Eine Hoch-

zeit predigt / vber

den spruch zun Debtes
ern am .xiiij. Ca-
pitel.

Geprediget durch D.
Mar. Luther.

Wittenberg

1531

Th. 40 797

Sächsische
Landesbibliothek

9. JUNI 1981

Dresden

G

Eine hochzeit predigt / vber den
spruch zun Hebreern

am Dreyzehenden Capitel.

Gepredigt durch Mar.

Luther.



Ich wil itzt ein wenig vom ehelichen leben vnd stande reden / die weil vormals gnug dauon geschrieben / aber doch ist's auch der nötigste stück eins / welchs man inn der Christenheit predigen / vnd das die Christen wissen sollē / Auff das nū die selbige lere vom ehestand auch in der welt bleibe / die vnter dem Bapstumb so gering gehalten vnd gepredigt / da alles lob vnd alle predigt / allein auff die keuscheit vnd iungfrawschafft gangen / gleich ob alle welt keuscheit were / so ihr doch gar wenig ist / die mit der gabe begabet sind / So wollen wir itzt den spruch fur vns nemen / welcher inn der Epistel zun Hebre. am. xiiij. Capitel geschrieben stehet.

Die Ehe sol eherlich gehalten werden bey allen / vnd das ehe bette vnbefleckt / Die hurer aber vnd die ehebrecher / wird Gott richten.

Also leret der Apostel hie nicht die Weiden / sondern die Christen / die getaufft sind / das sie allesampt

an also

also leben / das kein vnzüchtig hurnleben vnter ihnen
sey / sondern das sie ihren stand eherlich vnd ihr bette
rein behalten. Darumb das erste / das man an die-
sem stand / wie auch an allen andern stenden die Got
gestift hat / lernen sol / ist das / das ein jeder wisse
vnd gewis dafur halte / das der ehestand von Gott
geordnet vnd gestift sey. Das ist fast die höchste
kunst im ehelichen leben zu wissen / das man den
stand lerne ansehen nach der höchsten ehre / nemlich /
das er Gottes gestift ist vnd Gottes wort hat.

Wol haben die alten Doctores geprediget / das
der ehestand / der frucht / trew vnd lieb halben zulo-
ben sey / Ist aber nicht auch die leibliche nützung ein
köstlich ding / das die erste tugent des ehestands ge-
rümet ist / das sich ein man auff sein weib verlassen
darff / sein leib vnd gut auff dieser erden dem weib
tröstlich befehlen / das es bey ihr als wol bewaret
sey / als bey ihm / Diese frucht were auch wol eine /
Aber wir wollen die selbigen nicht erzelen / befehlen
solchs den Rhetoren. Christlich vnd gottlich da-
von zu reden / ist das das höchste / das Gottes wort
an deinem weibe / vnd an deinem man geschrieben
ist / wenn du dein weib also ansiehst / als were nur
eins vnd keins mehr auff dieser welt / vnd wenn du
deinen man also ansiehst / als were nur einer / vnd
sonst keiner mehr inn der welt / das kein könig / ja au-
ch die Sonne nicht schöner scheinen / vnd inn deinen
augen leuchten sol / als eben dein fraw / odder dein
man / Denn alhie hastu Gottes wort / welchs die
die fraw odder den man zuspricht / schenckt dir die
fraw /

fraw oder den man / Spricht / der man sol dein sein /
die fraw sol dein / das gefelt mir so wol / alle Engel
vnd Creaturn haben lust vnd freud darob / Denn
es ist ihe kein schmuck vber Gottes wort / damit du
dein weib ansiehst / als ein Gottes geschenck / Also
kanstu kein blöds gewissen haben.

Wie wol es scheint / als sey es leichtlich gered /
vnd wer weis das nicht / das der Ehestand von Got
gestift vnd eingesetzt / im Paradis geschaffen / vnd
auch außserhalb des Paradis bestettiget vnd geseg-
net. Wie Moses solchs anzeigt Gene. i. ij. vnd. ix. das
weis iderman wol / Ich hab auch die wort lernen
nach reden / aber es ist ein solche kunst / die ich noch
nicht kan / lerne noch jmer daran. Die vernunft
vnd welt helt es nicht sonderlich dafur / das der ehe-
stand ein Gottes gestift sey / Wie auch die Weiden
gemeinet haben / das es plumpweis vnd zufals also
geschehe / das einem diese odder ihene zu teil werde /
Denn wenn du wilt auff's beywohnen sehen / vnd die
augen auff das enfferliche beywesen kereft / so ist vn-
ter dem ehelichen leben vnd hurn leben gar kein vn-
terscheid / ist seer nahe beyeinander / vnd sibet fast an
einander gleich / das dieser ein Ehefraw / ihener ein
hurn hat / Darumb das einerley person man vnd
weib auff beiden seitten / im ehelichen vnd hurn le-
ben / beyeinander wonen.

Daher ist's komen / das man so ein gauckelspiel
ans dem ehestand gemacht / vnd allenthalben so lei-
chtfertig dauon geredt hat / Das flenst alles daher /

a iij das

Das es dem hurn leben so nahe vnd gleich sihet. Dar
umb ist die höchste kunst / die allein fur die Christen
gehört / vnd die Christen sein wollen / das man das
eheliche leben von der hurerey wisse zu vnterscheiden /
das ein eheman gewis sey / vnd sagen könne / das
weib hat mir Gott gegeben / bey der sol ich wonen /
vnd ein Ehefrau sagen könne / den man hat mir
Got gegeben / bey dem sol ich zu bette vnd tisch wo-
nen &c. Wolan diese kunst ist hoch vnd von nöten zu
wissen / die lerne wer do kan.

Des gleichen die Sophisten haben diesen stand
nur von aussen angesehen / fur ein vnzüchtig leben
geacht / vnd ein eitel vnnütz ding draus gemacht /
Ober das haben sie auch gelebt inn einem vnzüchtia-
gen hurn leben / des lebens sie wol gewonet sind /
darumb haben sie den Ehestand nicht höher könn-
nen preisen / Ja noch darzu die ehelichen gewissen be-
schwert vnd verletzt / das sie von diesem stand geredt
haben / als were er wie ein ander gemein vnzüchtig
leben / den selbigen jamer wil ich itzt nicht rüren / Wie
sie aber auch widderumb von Gott gestrafft sind /
vnd wie solche verachtung des ehestands an ihn ges-
rochen ist / wissen wir seer wol / vnd sie befindens
gnugsam / das auch schier die natürliche liebe zum
weib odder man / nicht allein zum ehelichen leben /
bey ihn verlosschen ist / Das haben sie ihn zu lohn /
die Gott wolten leren vnd meistern.

Ein Christ aber sol die ehe vom vnehelichen leben
wol wissen zu vnterscheiden. Wo durch durch Got-
tes wort / Denn an den ehestand hat Gott sein wort
gehengt /

gehengt/da er spricht Genesis.i. Gott schuff ein men
lin vnd freulin/vnd gab dem Adam die Lva/ seg
net sie/vnd sprach zu ihn/ Seid fruchtbar vnd meh
ret euch zc.wie solcher segnen hernach im.ix. Cap. wid
der vernewet ist. Item/Genesis.ij. Es ist nicht gut/
das der mensch allein sey/ich wil ihm ein gehülffen
vmb ihn machen / Darumb wird ein man seinen
vater vnd seine mutter verlassen/vnd an seinem weib
hängen/vnd werden sein zwey ein fleisch. Item
Matthai.xix. Was Got zusammen gefugt/das sol kein
mensch scheidē/ On dis wort were der ehelich stand
auch ein vnzüchtig leben vnd kein ehestand. Darumb
das furnemste im ehestand ist/das man könne das
wort darinnen sehen leuchten.

Des wil ich ein Exempel geben/ob ihrs dester
bas künd fassen/Wenn ich sihe/ wie ein reuber oder
mörder einem den kopff abhawet / so ist das werck
eben dem gleich/wo der Fürst odder Richter einem
den hals abhawen leßt/ Darumb haben sie auch et
wo so gepredigt/die heillosen dropffen/das die ober
keit sol nicht blutigirig sein/ sondern barmhertzigkeit
erzeigen/damit sie das weltlich schwerd gar stumpff
gemacht/das sich die leute entsetzt haben/ wenn sie
vbers blut richten solten/ Ich hab selbs viel feiner
männer gesehen vnd gekand/wenn sie solten im stuel
sitzen/vnd etwa ein blut vrteil fellen/ sind sie dafür
geflogen/vnd anderswo hin gezogen/ das sie ja ni
cht dabey weren/vnd sich des greulichen wercks teil
hafftig macheten. Dieser vnd andere irthumb sind
alle daher komen / das wir die stende / on Gottes
wort

wort/von aussen an vnd nach dem werck ansehen/
vnd lassen die weil Gottes wort faren/ Denn wenn
ein mörder einem den kopff abhawet / thut er nicht
recht daran/denn er hat des keinen befelch/da ist kein
Gottes wort/ja er thut solches widder Gottes wort
vnd gepot/Welches ihm verbeut / nicht zu tödten/
Darumb ist es ein mord/eitel helle/finsternis vnd tod.
Wenn aber der Furst odder richter einen tödt / da ist
vnsers Herr Gottes wort vnd befelch bey / da selbst
fürestu das schwerd nicht/ sondern Gott / da selbst
leucht das schwerd/als were es inn Gottes hand/
als füret es ein Engel / vnd kein mensch / darumb
das Gottes wort dran hanget/Welches gebent/die
bösen zu straffen/die fromen zuschützen vnd verteidin
gen/zu den Romern.xiiij.

Item ein dieb/der einem andern sein kleider od:
der sonst was stilet/das ist diesem werck seer gleich/
so der richter odder stadknecht vmbgehet / vnd ne:
men einem ein pfand/vnd ist doch zwisschen ihn ein
grosse vnterscheid/ Der richter thuts mit recht / der
sol es nemen/vnd hat heilige vnd Gottes feust/denn
Gottes wort spricht zu ihm / Du solt das vnrecht
straffen/die gerechtigkeit fordern vnd handhaben/
Der dieb aber hat des weder befelch noch recht / ei:
nem andern das seine zunemen / ja Gott hats ihm
verboten/Du solt nicht stelen/darumb hat er eitel
teuffliche verdampte verfluchte feuste/vnd sünde feus:
te damit er zugreiffst.

Also auch das ihr zwey/man vnd weib sin vnzü:
chtigen

ehelichen leben bey einander sind / das scheint dem
ehelichen leben gar gleich sein / denn sie kleiden einan-
der / gehen vnd arbeiten mit einander / sind zu bette
vnd tisch den ehelichen so gleich / das sichs mit der
vernunfft nicht scheiden lesset / wie man denn offft ge-
funden hat / das ihr zwey auff dem felde inn büschen
bey einander gessen / die man fur ehelich gehalten /
vnd hat doch anders von ihnen erfahren / Aber im
ehelichen leben ist Gott mit seinem wort / vnd heilic-
get das leben / Spricht / wenn du bey deinem weib
wonest / gehest mit ihr zu bette vnd tisch / so ist es ni-
cht ein leben / wie hurn vnd buben zusamen komen /
sondern ein heiligs vnd gottlichs beywonen / das
von Gott selbs also geordnet vnd gestiftet ist / gleich
wie das ander hurn leben von ihm verboten ist / als
hie inn dieser Epistel / vnd inn den zehen geboten /
Du solt nicht ehebrechen / Item / Du solt nicht be-
geren deines nehesten weib &c.

Ah wolt Gott / das ein jeder inn einem solchen
synn daher gieng / das er von hertzen sagen kunde /
das ich mit meinem ehelichen gemalh / alhie sitze
vnd lebe / das bin ich gewis / das es Gotte also wol
gefalle / das Gott also gestiftet vnd geordnet hat /
das mich Gottes wort solchs heisset / Ein solch
wort das tröstet denn die ehelute widderumb / vnd
macht ein gut gewissen / Die aber vnehelich bey ein-
ander wonen / können solch gut gewissen nicht ha-
ben / denn sie sind widder Gottes wort / vnd nicht
inn Gottes namen / sondern inns Teuffels namen
beysamen.

b

Dis ist

Dis ist die rechte gulden kunst / die ihr wenig kon-
nen / ich kan sie auch noch nicht / wie ich gern wolt /
denn aus alter gewonheit sind vnser hertzen nicht
dazu gewenet inn diesem stande / wie auch inn an-
dern / allein auff das wort zusehen / vnd nicht auff
das werck. War ist's / das vnser fleisch vol böser lust
ist / die vns zu sunden reitzen / aber den selbigen mus
man nicht nachfolgen / sondern wenn du Gottes
wort dagegen heltest vnd ansihest / damit dieser stand
gesegnet vnd gezieret ist / das wird dich wol erhalten
vnd widderumb trösten / vnd wird dir ein heiligen
vnd geistlichen stand daraus machen. Vnd ihm ge-
schicht gewalt vnd vnrecht / das sie es einē weltlichen
stand genant haben / es solt ein göttlicher vnd geist-
licher stand heissen / Aber andere des Paps / der
Munch vnd Nonnen stende haben müssen geistlich
heissen / velleicht darumb / das der Teuffel ihr gott
vnd stifter auch ein geist ist / von welchem sie erdacht
vnd gemacht sind / Denn wo stehets geschrieben
das ein Munch ein schwarzze odder weisse kappen
tragen sol / diesen orden odder ihene regel füren / dis
odder das essen &c.

Vom ehestand aber find man geschrieben / das
Gott schaffet ein menlin vnd weiblin / vnd gab sie zu-
samen / befolhe ihn / sie solten kinder zeugen &c. Die
weil aber nu dieser stand das wort hat / vnd durch
das selbige wort geheiligt ist / vnd inn das wort / als
ein heiligthumb inn ein Monstrantzen / gefasset ist /
sol man ihn billich inn grossen ehren / vnd fur ein or-
denung / die Gott wolgefellt / halten / auff das ein je-
der ehe

der eheman odder ehefraw sicher vnd gewis sey / er
sey inn einem rechten geistlichen stand / nicht aus der
ehe / sondern inn der ehe / nach Gottes wort seggen
vnd ordenung.

Es ist auch diese predigt nicht allein des gewissen
halben von nöten / das du dir kein gewissen darüber
machest / so du bey deinem weib odder bey deinem
manne ligst / Denn Gott hats also geschaffen vnd
verordnet / sondern dienet auch widder den Teuffel /
Denn die noch nicht hierinnen sind / die dencken nur
es sey ein leben des wollusts / die aber drinnen sind /
die dencken viel anders / Item / die aufferhalb dieses
stands inn einem vnzüchtigen leben sind / die erken-
nen solch wort gar nicht / damit dieser stand gesch-
mückt vnd gesegnet wird / sehen ihn allein an nach
der eusserlichen laruen / fur ein solch leben darin man
nur gute tage vnd wollust suche / Wenn du dich aber
also drein schicken wilt / das du vber des mannes hut
vnd vber der frawen schleyer gottes wort leuchten
siehest / das sie ein gottes geschepff vnd werck sind /
als denn wird sich der Teuffel auff beiden seiten zu
dir finden / Suchestu wollust drinnen / die sol dir wol
vergehen / vnd zur vnlust verkeret werden / denn der
Teuffel kan es nicht leiden / das eheleut mit einander
freuntlich vnd eins sind.

Darumb auch leidet gott solche brunst die er dem
breutigam vnd der braut eingegeben vnd gedacht /
Ich mus dem narren so ein kappen anziehen / Denn
wo das nicht were / kund man die leute nimer inn das

b ij ehelich

eheleich leben bringen/ Vnd wo auch solche brünst
vnd lieb jmer stets bliebe/ so fresse eins das ander für
grosser lieb / Wie man am sprichwort sagt/ Dar
umb so ist der Teuffel dem stand feind / wie denn
auch sonst allem Gottes wort vnd wercken/ vnd ma
cht/ das man vnd weib offt mit einander auff stützig
werden/ der lieb vergessen/ werden vngedultig / vnd
müssen doch bey einander bleiben/ darumb so wird
ihñ die lust zur vnlust/ die freud jnn zorn vnd leid ver
wandelt/ wie denn auch solchs teglich erfarn/ die/
so es für Gottes werck vnd ordnung halten.

Derhalben sagt die schrift/ das drey ding sind/
darob Gott ein sonderlich wolgefallen hab/ vnd die
auch bey den menschen gelobt werden/ Nemlich/
das brüder vntereinander eins sind/ das nachbarn
einander freuntlich sind/ vnd das man vnd weib sich
lieblich mit einander vertragen/ Warumb preisset die
schrift die drey stücke so hoch? Darumb/ das/ wo
brüder fride haben vnd eins bleiben / das ist zu mal
ein selzamer vogel/ des gleichen das nachbarn freunt
lich bey einander leben / das einer dem andern ver
trawen darff/ nicht neidisch odder hemisch auff eins
ander sind/ vnd das ehelente sein fridsame bey eins
ander wonen. Wer nu den Ehestand von aussen
allein ansihet/ der denckt/ Ihe ist denn das so ein gro
sse kunst / deinem nachbarn freuntlich zu sein/ dein
ehelich gemalh lieben/ vnd das brüder mit einander
eins seyen/ Solten brüder nicht eins sein / wer wolt
denn eins sein? Ja das sihet man wol / wenn es ein
wenig scheidigs guts antrifft/ das sie zu teilen haben
ehe

ehe einer dem andern was nachlies / er vbergebe ehe
sonst ander funff.

Also erhebt sich offte vnter den schwestern ein had
der vnd zancck vmb eins bitten brods odder vmb eins
truncks willen / vmb ein wenig spehn odder strohs
willen / Also gehets auch mit der liebe / die wir an vn
sern nachbarn erzeigen sollen / das die selbige offte
nach bleibt vmb eins vnendligē dings willen / das vil
leicht einer dem andern ein hün gescheucht zc. Also
Konnen man vnd weib mit andern leuten jmer besser
eins bleiben / denn mit jhn selbs / vnd kan zu weilen
eins ein wort reden / das sich nicht wol gezimpt / das
dem andern durchs hertz gehen mocht / vrsach ist
die / das der Sathan nicht lust dazu hat / wo frid od
der einigkeit ist / Wenn sie denn nu nicht eins sind /
was kan da fur freud odder lust sein ? Darumb mus
einer wider solchen vnlust vnd verdries gerüstet sein /
Ja sprichstu / dennoch ist Gottes stand / vnd Gott
hat mich hinein geworffen / es solt doch jhe sein frid
sam vnd stille drinnen sein ? Es heist Pacientia brua
der / Der stand ist darumb nicht böse / noch zuvera
chten / obs wol nicht alzeit gleich drinnen zugehet /
Es kan so rein nicht abgehen / als hettens die tau
ben erlesen.

Darumb sagt man auch von den Eheleuten / die
sich wol mit einander vertragen / Das ist ein schöne
Ehe / als wolt man sagen / Es geredt selten so wol /
Das sich aber etwo zwey ehelent nicht lieb zusammen
haben / ist kein wunder / denn sie trachten vnd sehen
b ij nicht

nicht darnach wie sie inn Gottes wort gefasset vnd
begriffen sind / Denn wo sie solches sehen kondten /
wie sie so mit einem hellen liecht vnd Sonnen glantz
vmbgeben weren / so gült es ihnen alles gleich / Nu
aber hats Gott also gemenget / vnd senff bey das ge-
braten gesetzt / das ihnen deste bas schmecketen / vnd
das ihn Gott also begegnen mocht / vnd sie das ihe-
nig verlassen / das sie vnwillig vnd vnlustig machet /
vnd dencken / da hab ich Gottes wort / damit dich
Gott gezieret vnd gesegnet / das sol mir lieber sein /
denn all vnlust / vnfrid vnd zwitteracht.

Das ist eins / wie sich der Teuffel versucht allen
vnlust vnd vneinigkeit in dem ehestand anzurichten /
das eins dem andern spinnen feind wird / vbel haus-
halten / tregt eins hinden aus / das ander forn aus /
Zubricht der man krüglein / zubricht die fraw hefes-
lein / Da wird denn eine helle vnd der Teuffel gar
draus / des er ihm gar wol lachen mag. Wo aber
Ehelente mit einander freuntlich leben / da macht er
ihm kein freude aus / sondern Gotte gefellt es wol /
der lacht vnd ist frölich darob / Darauff spricht der
heilige Paulus .j. Corinth. vij. wo es sich ja so begibt /
das Ehelente vneins werden / die sollen sich widder
mit einander vereinigen vnd versunen / auff das ihr
gebet nicht verhindert werde / Desgleichen wil S.
Petrus inn seiner ersten Epistel / das man dem weibs
bilde / als dem schwachsten werckzeug verschonen
sol zc. Solchs haben die lieben Apostel wol gesehen /
wie der Teuffel seinen samen vnter die Ehelente seet /
vnd

vnd wollen die leute widerumb mit dem wort trö-
sten vnd auffrichten.

Aber so gehets / wer auffer dem ehestand ist / der
meinet / wenn er drein keme / er wolte jmerdar lachen
vnd guter ding sein / nimer nichts reden / das den
andern verdrieslich sey / Das wirstu wol lassen / du
meinst / es sey ein solch ding / das sich aus zufall be-
geb / das aus deinen gedancken her kome. Nein / es
ist Gottes stand vnd ordnung / das / wer in ehestand
gehet / der gehet inn ein recht Kloster / das voller an-
fechtung ist / Das sie nu gleich sein / wie reich / wie
schöne / wie freuntlich sie sey / so wirstu zuschaffen ge-
nug haben / das du solche liebe / solche freuntschaft
behaltest / Denn es stehet in deiner hand nicht / Vnd
hast dazu einen starcken feind / welcher heist der Teu-
ffel / der von hertzen gern sihet / das man im haus
schnurt vnd murret / stuel / benck vnd tische vber ein-
ander wirfft / mit der frawen die stuben keret / odder
sonst ein maul tasschen gibt / das ist des Teuffels seit-
enspiel / des lachter ihm inn die faust hinein / das ist
sein meinung / vnd das wolt er gern haben / das kein
man bey seinem weib bliebe / vnd das keine ihrē man
lieb hette. Darumb darffstu das Ehelich leben nicht
von aussen ansehen / denn da sihestu / wie es voller an-
fechtung vnd betrübtnis ist / sondern nach dem
wort / damit es gezieret vnd gefasset ist / das selbige
wort wird dir die bittere wermut wol zu honig ma-
chen / vnd die betrübtnis wol widder inn freude ver-
wandeln.

Darnach auff der andern seiten / wird er dich aus-
ch mit

H mit lust anfechten / Denn so keusch wirstu nicht
sein (es were denn das du ein sonderliche gnade von
Gott hettest) vnd so lieb wirstu dein weib nimer ha-
ben / das du ihr nicht müde werdest / oder ein andere
nicht lieber soltest gewinnen / Desgleichen auch dein
weib wird dich so lieb nimer haben / das ihr nicht da-
neben ein ander was gefallen werde / **E**y behüt mich
Gott / solt ich mein weib nicht lieb haben? solt ich
meines mannes vberdrüssig werden? **I**e Gott behüt
mich auch / Denn sihe mit zu / du meinst wol / das
man dich eusserlich dafur ansehe / wie du keusche le-
best / aber doch gleichwol wirstu solche gedanccken /
die dich zu sünden reitzen werden / inn deinem hertzen
wol fülen.

Darumb so du mit Gottes wort gerüstet bist / vnd
damit als mit einer gülden kron vnd purpur rock an-
gezogen / so bistu gnug geschmückt / als denn wird
dir der geist sagen / nach Gottes wort / das weib ist
dir gegeben / diese vnd kein andere soltu haben / also
wird auch das weib sagen / der man ist mein / den
vnd kein andern wil ich widder sehen noch hören.
Wie aber so das weib schnurt vnd murt? das du sas-
gen wirst / **E**y hat mich der henger hinder das weib
bracht / das sie dis vnd ihenis ankome / alle die mir
dazu geratten vnd geholffen haben / ihe hette ich
ihene genommen / die ist doch ja so fein freuntlich.
Vnd wird dazu böse lust mit zu schlagen / wie die Poe-
ten schreiben / das die liebe gantz wüet vnd tobet?

Darumb so sehe ein iglicher mit zu / das er bey sei-
nem

nem ehelichen gemalh bleibet/welchs ihm Gott gegeben hat/vnd lasse ihm ein anders nicht besser gefallen / Das wirstu aber nicht thun konnen / on durch Gottes wort/wenn du allein dasselbig fur augen hast/vnd dich alzeit darinnen spiegelst. Als denn wird dir dein bette eitel gilden werden / dein tisch / dein kamer / dein haus / vnd alles an deinem weibe lauter gedigen gold werden / Denn du bist inn dem wort/welchs zu dir sagt / Du solt ein Eheman sein / vnd du weib solt dich zu deinem Eheman halten / also hats Gott geordnet / Wenn du den Ehestand also durchs wort vnd im wort ansiehst / vnd so kostlich gegeneinander achtest / so wird dir eins andern weib nicht so wol gefallen / als deine / Denn das wort wird es nicht leiden / ob dichs auch dunccket / das ein andere mit Worten / die aller freuntlichste vnd schonste were / dennoch ist sie dir inn deinen augen kolh schwarz / vnd mit Teuffels kot beschmirt / Denn da findestu nicht diesen schmuck / Gottes wort / Deine aber ist dir die hubschte vnd lieblichste / als die dir Gott mit seinem lieben wort gezieret hat.

Aber / wie ich gesagt habe / es ist die hochste kunst / diesen stand inn Gottes wort anzusehen / welchs allein beide den stand vnd die Eheleute lieblich macht / Vnd ob sich irgends ein vnlust erregen wurde / so mus sie dennoch vntergehen vnd als inn einem tiefen meer verschwinden / Denn das wort ist krefftig vnd heilig / vnd macht all ander ding heilig / wo es erkand vnd gefasset wird / Wie wol es der Teuffel nicht gern leidet / das sie eheliche kenscheit halten /

c vnd

vnd keusch im ehestand leben / Denn er sucht in mer
vrsach vnd mittel / wie er sie zureisse / das die frau ge-
denckt / ihe hette ich diesen odder ihenen jungen gesel-
len fur meinen vnfluetigen man / vnd widderumb der
man gedencckt / ihe hette ich diese oder ihene hübsche
dirne fur mein heslich weib zc. Vnd ersihet der narr
als denn / ein andere / on Gottes wort / lesset seine far-
ren / vergisset der selben / da er Gottes wort bey hat /
Wie man wol solche narren gefunden hat / vnd noch
immerdar findet / die ihre schöne weiber verlassen /
vnd sich etwa an vnfluetige garstige secte gehengt ha-
ben / Das kompt alles daher / das sie ihren stand ni-
cht besser denn fur ein vnzüchtig leben ansehen.

Denn der Sathan ist dir feind / vnd das fleisch
furwitzig / dazu so ist auch der vberdrus inn vns ge-
pflantzet / der hört nicht auff / weil wir leben / es sey
denn / das du an Gottes wort hangen bleibst / Ja
es begibt sich wol / das dir deine magd bas gefalle /
denn dein eigen weib / vnd das der frauen der knecht
bas sol gefallen denn ihr man / Das richt alles der
Teuffel an / der die menschen also verblendet / das du
Gottes wort nicht ansihest / welches dir diesen man /
odder dis weib / ausmalet vnd zueigent / also / das du
fur das wort vnd vber das wort / keine andere anse-
hen solt / ihr zu einem gemalh begern / Denn wer sol-
ches thut / der hat schon die ehe gebrochen / wie
Christus solchs auslegt Matthei am funfften.

Solches wil nu hie auch der heilige Apostel leren
da er die Christen vermanet / das sie ja den ehestand
lieb

lieb vnd werd halten / vnd das bette rein vnd vnbesle-
cket / Denn solches wil Gott von euch haben / Wer-
det ihrs aber besser vnd anders wollen machen / wie
der Papsst mit seinen lieben geistlichen gethan hat /
so wil ich solches an euch vngestraft nicht lassen /
wie er denn solches redlich vnd mit der that an ihn
beweiset hat / Von diesem stande wissen die Weiden
vnd Papiisten gar nichts zu predigen / Ja es ist bey
ihnen ein fleischlicher vnd weltlicher stand geacht /
Aber ihre falsche ertichte stende haben müssen geist-
lose (Ey geistliche wolt ich sie) heissen / Damit sie
also den Eheleuten böse gewissen inn ihrem stande
gemacht / So es doch solt vmbgekeret sein / wie vor-
mals gesagt ist.

Das aber der Apostel hie sagt / Das ehelich leben
sol eherlich vnd das bette rein gehalten werde. Die
zwey stück setzt er widder solche oben erzelte anfech-
tungen / nemlich / das vnser fleisch viel schedlicher
wollust vnd vberdrus hat / vnd der furwitz im Ehe-
stand gros ist / Daraus denn folget / das mich der
furwitz dorthin treibet / vberdrus hieher jagt / wol-
lust anderswo hin wirfft / Vnd ist solches alhie nicht
allein zumerstehen / das die bette vnd tücher rein gewa-
sschen werden / Sondern diese vnreinigkeit vnd fle-
cken im Ehebette sind / hurerey vnd ehebruch / Das
sind die rechten schandfleck die das Ehebette verun-
reinen / besflecken / vnd vervnehren / Denn die auffer
diesem stande inn einem vnzüchtigen leben gehen /
als hurntreiber sind / die halten diesen stand fur ni-
chts / sondern verlestern vnd verachten beide Gottes

c ij wort

wort vnd den stand / wie from sie sich fur der welt
stellen / Die aber im Ehestand sind / vnd halten den
selben nicht / sondern brechen ihn / widder Gottes
gepot vnd ordnung / die selbigen beslecken vnd verun
reinen ihn.

Darumb alle die / so das eheliche leben also anse
hen / als sey es ein stand der sich ongeuerde plumps
weis also begeben / die schenden den selbigen / denn sie
sehen nicht / das die ehelent inn Gottes wort gefasset
sind / Darumb thun sie dem Ehestand keine ehre /
sondern legen ihm alle schande auff / Denn sie lassen
ihn ihr schendlich vnzuchtig leben bas gefallē / denn
das gottlich vnd eherlich leben / Dafur warnet er sie
hie / das sie ja zusehen / vnd den ehestand nicht fur ein
solch vnzuchtig leben achten / sondern halten es fur
gros / herrlich / vnd inn allen ehren / Nemlich also /
wenn ihr verlasset das hurnleben / vnd begeben euch
inn das ehelich leben / Darnach wenn ihr nu darein
komen seyt / das ihr euch ja wol fursehet / vnd das
bette nicht besuddelt / das ist / das du Ehefrau dich
zu deinem man haltest / vnd du Ehemann dich an dei
nem weib genügen lassst / Wo nicht / so ist das bette
geschendet / Gottes wort verworffen / aus dem ehe
stand getretten / vnd das bette verderbet vnd (hette
schier gesagt) drein gethan.

Also sihe / wenn der Teuffel mit dem furwitz vnd
vberdrus zu dir kompt / Sey klug / ergreiff Gottes
wort vnd dencke / Gott hat mich zu einem manne ge
schaffen / diese hat er mir inn die arm gegeben / die sol
mein sein zc. Thustu das / so wirstu dester leichter dein
bette

bette rein behalten / Denn das wort wird dir eine
furcht vnd schew machen / das du dein eheweib ni-
cht verlassest / ob sie wol vngedultig vnd eigensynnig
ist / so wird sie dir dennoch vmb des worts willen be-
sser gefallen / denn ein andere mit einem gülden schleis-
er / vnd bist viel höher geehret vnd geschmückt / denn
so du aller Könige geschencck vnd güter hettest / Also
ein köstlicher schleier ist / vmb ein ehelichen schleier /
vnd so ein wol geschmückter hut vmb ein ehelichen
hut / wer ihn dafür kan halten vnd ansehen.

Dagegen sind nu etliche klügling / die suchen ihr
auszüge / damit sie ja nicht ehelich werdē / vnd zuletzt
gar inn der hurerey ersauffen / die geben fur / Es ges-
schehe dennoch viel böses im Ehestand / vnd werde
viel drinnen gesündigt. Das leugnet niemand nicht /
das so gar on sünde abgehe / Aber gib du mir einen
stand / der on sünde abgehet. Mit der weise / so müste
ich nimer mehr keine predigt thun / müste kein knecht
odder magd dienen / die oberkeit müste das schwerd
nicht brauchen / kein Edelman kein pferd beschrei-
ten. Noch nicht lieber Juncker / Wir werden hie inn
diesem leben so rein nimer sein / das wir irgend ein gut
werck on sünde thetten. Dieser artickele mus stehen
bleiben / Ich glaube die vergebung der sünden.

Sprichstu abermals / das sie dennoch etwan mit
einander zörnen / vnd sündigt also der Ehemann vnd
Ehefrau. Ihe behüt vns Gott / wiltu darumb den
Ehestand verwerffen. Lieber mache mir hie keinen
auszug mit diesem stande / Sünde hin / sünde her /
c iij wiltu

wiltu einen sijn die funde stecken / so stecke den andern
auch hinein / wiltu aber einen heraus ziehen / so ziehe
den andern auch heraus. Ich wil nimer keine pres-
digt haben gethan noch thun / die ich one funde wil
gethan haben / ich werde ein sinder bleiben / vnd wil
den artickele / vergebung der sunden / stehen lassen vnd
nicht verleugnen / Zörnen sie zu weilen mit einander /
das bekennen wir / das sie daran sundigen / aber das
gegen / ist die heiligkeit viel herrlicher / vnd die verge-
bung souiel dester grösser / wenn ich allein darinnen
bleibe vnd nicht eraus schreite / vnd bleib bey meinem
stande / da zu mich Gott geruffen hat / Wie wol es
on funde nicht abgehet / so ist doch Gottes wort so
gros / das vmb desselbigen willen der stand auch rein
vnd heilig ist.

Darumb du verharter verstockter mensch / darff-
stu eins mannes / oder darffstu eins weibs / warumb
nimpstu nicht eine die dir Gott gibt / vnd schmückt
dir sie mit seinem wort / segnet sie vnd weihet dir sie.
Warumb wiltu nicht viel lieber das geschencke von
Gott annemen / des du bedarffst (welchs dir Gott
gönnet / daran du viel ein besser Kleinod hettest denn
an der Sonnen / Ja / welches du mit frölichem her-
tzen / mit Gottes wolgefallen vnd aller Engeln vnd
Creaturē lieb habemochtest) denn einem andern sein
weib rauben vnd stelen / die dir nicht gebürt / vnd
Gott nicht geschencckt hat / da der Teuffel ist vnd da
du verflucht bist. Denn Gott hat sie mit seinem wort
nicht geschmückt / ja seines worts gar beraubt. Was
aber on Gottes wort ist / das heist eitel greuel vnd vn-
flat fur

flut fur Got. Darumb die weil du hurest vnd bubest/
ists ein gewis zeichē / das du on glauben bist / Gottes
wort nicht fur war heltest / Denn wenn solches inn
dir brennet / so wirstu sagen / die ist eins andern / ges
het mich nicht an / ist schendlich inn meinen augen /
ich wil eine andere haben / die mir Gott geben wird /
Vnd nicht mit deiner tollen vernunfft vmb dich ses
hen / nach eines andern weib / da Gott vber zörnet
vnd alle Engel / das kein bestand hat / das Gott dar
zu hart straffen wird / wie er alhie sagt / So geschicht
dir den eben recht / Warumb verachtestu das edel ge
schencke / das dir Got aus gnaden vnd barmhertzig
keit anbeut / gesegnet vnd geschmückt hat / schlechtes
inn wind / fragst nicht darnach / obs gott gefalle od
der nicht / welchs ein zeichen ist des vnglaubens.

Das sey dis mal der Hochzeit vnd dem Ehestand zu
eheren gesagt / Darumb wollen wir Gott anruffen /
das er vns sein gnad verleihe / solches also zu gleuben
vnd zu leben / **A M E N.**

**Gedruckt zu Wittenberg durch
Hans Weis D. M. XXXI.**

Faint, illegible text, likely bleed-through from the reverse side of the page.

3 A 6389

